

# Istorgia dal provediment medicinal

■ La medischna da scola sco che nus l'enconuschain oz è sa sviluppada per gronda part en il decurs dal 19avel e 20avel tschientaner; il medem vala er per il standard dal provediment medicinal actual (medis, ospitals e.a.). Il LIR mussa co che la situaziun sa preschenta en il temp medieval e premodern e dat in sguard al svilup da las instituziuns medicinalas odiernas.

## Sanità

Il term sanità designescha la totalità da las normas e da las valurs, da la pratica vivida e da las persunas pertutgadas (tractantas e tractadas) en connex cun la sanadad corporala e psichica respectivamain cun malsognas. Quest artigel metta l'accent sin ils process e las instituziuns perceptiblas.

Las enconuschientschas da la sanità en la Rezia medievala èn marginalas. Lung ils pass strategevan l'investgieu da Cuira e las claustras ospizis (numnads era xenodochis) per l'alloschament dad esters trapassants, paupers e malsaus. Per l'alimentaziun da quels procuravan era diaconias. Questas duas instituziuns stattan a l'origin dals ospitals. Il provediment medicinal era en il temp medieval essenzialmain en ils mauns da spirituals, barbiers e barbiers chirurgs (tudestg Bader), entant che l'assistenza al part vegniva garantida da spendreras (dunnas cun experienscha). Da grond'impurtanza eran senza dubi ils bogns, la medischna da chasa e las cardientschas blauas. La mancanza da medis en las vals alpinas aveva fullà via als scharlatans che faschevan propaganda sin fieras ed a festas per lur art da guarir e per lur itgs (miraculus). Medis erudits (sesents) èn attestads a Tavau il 1487 (Wilhelm Beeli) ed a Cuira la fin dal 15avel tschientaner (Bernardus Stupanus), en l'Engiadina en il 16avel tschientaner (NN), a Glion (Georg Iserin) ed en il Mesauc en il 17avel tschientaner (Rodolfo Antonio). Il 1762 dumbrava Cuira trais medis studegiads ed il rest dal Grischun cun ses ca. 70 000 abitants maximalmain set (1829 29; 1884 40). Fin vers la fin dal 18avel tschientaner, cura che pioniers da la medischna academica tschertgavan da surmuntar la tenuta fatalistica e passiva da vastas gruppas da la populaziun, predominava ina relaziun prescientifica envers la medischna.

Il favrer 1735 han las Trais Lias institui l'emprim Cussegl da sanità cun mintgamaì dus commembers per Lia. Quest cussegl aveva paucas competenzas ed era vegnì schlià durant la helvetica; ils vischina-

## Statistica dal provediment medicinal en il Grischun\*

	1920	1950	1970	1990	1995	1998	2000	2005	2008
Medis	133	144	173	323	373	407	470	336	308
Abitants per medi	900	950	940	540	500	460	400	560	620
Medis dentists	13	42	47	67	86	88	95	80	86
Abitants per medi dentist	9220	3260	3450	2560	2170	2130	1960	2350	2210
Apotechers	17	25	32	40	42	63	73	37	41
Abitants per apotecher	7050	5480	5070	4350	4350	2940	2560	5080	4650

\*exclus ils medis da bogns stagionalis

F.: Äskulap in Graubünden; Graubünden in Zahlen

## Svilup dal provediment medicinal en il decurs dals ultims 100 onns. (LIR)

dis suverans ed ils cumins avevan impedi in sistem sanitar coordinà sper la prevenziun cunter epidemias (consultaziun davart mesiras da quarantina e bloccadas da vias e pass). Malsognas che mettevan blers sut terra avant ura en il 18avel tschientaner eran oravant tut la pneumonia (popular: puntga, malcostas), inflamaziuns da las mandlas, la virola e malsognas da l'aua (idropsia), en intginas valladas era inflamaziuns da la beglia (disenteria). Tenor statisticas da la fin dal 18avel tschientaner murivan in terz dals creschids da la pneumonia, in quart da tuberculosa, la mesadad dals uffants da la virola ed auters da la stgarlattina. Pagliolancas pativan e murivan d'infeziuns u da tractaments fallads. La gliued che viveva sper il Rain tranter il Signuradi e Cazas pativa sur mesira dal gutter.

Il zercladur 1805 è vegnì convocà in Cussegl da sanità stabel che adempliva oravant tut pensums da polizia d'epidemias: quarantina da muvel infectà, cumbat cunter scharlatanaria, ordinaziun da vaccinaziuns (urden medicinal dal 1808, amplifitgà il 1822 ed il 1929). Postulats dal Pusclav, da l'Engiadina (1811) e dals reacziunaris (1814) da schliar il Cussegl da sanità èn vegnids refusads dal Cussegl grond. Il 1845 èn vegnids nominads medis districtuals, il 1850 in veterinari chantunale ed a partir dal 1848 exequiva il Cussegl da sanità, ensemen cun la Regenza, las funcziuns da la polizia sanitar ed aveva la surveglianza suprema sur ils ospitals, la clinica psichiatrica, ils bogns da cura, las spendreras e las praschuns. El era medemamain competent da nominar la cummissiun d'examinaziun chantunale per medis, apotechers, veterinaris (fin a l'introduziun da l'examen federal da medi-

schina il 1877) e dals dentists (fin il 1888). Tranter il 1853 (Ospital da la S. Crusch a Cuira) ed il 1941 (Ospital retic chantunale ed Ospital regional a Cuira) han ins avert ils divers ospitals a Cuira ed ils ospitals regiunals en las valladas. Il svilup da questes ospitals a centers da scolaziun per il personal medicinal ed a basas instituziunalas per il provediment medicinal da la populaziun ha transfurmà profundamain la sanità grischuna.

Las competenzas da la Confederaziun èn s'augmentadas punctualmain dapi il 1848. Il 1879 è vegnida nominada ina cummissiun federala da sanità (puspè dissolvida il 1882). L'Uffizi federal da sanadad (oz Uffizi federal da sanadad publica) è vegnì creà il 1893. Gia a partir dal 1876 vegniva manada ina statistica federala per fatgs sanitaris (motivs dals mortoris, frequenza da malsognas e.u.v.), ed il 1888 ha il Cussegl federal relaschà in reglament per l'examinaziun ed admissiun dals medis dentists. Ulteriuras competenzas da la Confederaziun eran la polizia da victualias ed il cumbat cunter la tuberculosa ed il reumatism. Il davos transferiment da competenzas sin il champ sanitar che merita da vegnir menziunà è stada la submitiun da las professiuns en il sectur sanitar a la responsabladad da la Confederaziun tras la Constituziun federala dal 1999 (art. 63).

Il svilup scientific e professional da la medischna dapi la Segunda Guerra mundiala ha pussibilità en la sanità ina purschida fitg differenziada e per part standardisada, en la quala purschiders da servetschs privats e publics, finanziads dal stadi e da las cassas da malsaus, provedan pazients pli e pli pretensius ed attempads. L'augment quantitativ da las prestaziuns medicinalas va a pèr ed a pass cun in svilup massiv d'apparaturas tecnicis e da medicaments custavels (sur d'in raziunament da quels vegn discutà oz punctualmain).

Sco exponent d'ina medischna alternativa ed aderent da la medischna natirala ha il plevon Johannes Künzle fullà via en il Grischun il 1922, gudagnond cunter l'opposiziun serrada dals medis da scola la votaziun davart l'admissiun da la medischna natirala. La medischna da scola ha dentant mantegnì fin oz ses vast monopol da tgira e tractament. Quel è dentant vegnì mitigà parzialmain cun l'admissiun da la chiropratica, da la psicoterapia e da l'acupuntura en cumbinaziun cun la medischna da scola, l'omeopatia e metodos da tractament sumegliant.

Il 2008 dumbrava il Grischun trais ospitals chantunals (Cuira), nov ospitals regiunals (Castaneda, Tavau, Glion, Samedan, Suagnign, Aschera, Scuol, Sta. Maria en Val Müstair e Tusaun), duas clinicas psichiatricas (Cazas e Cuira), duas clinicas spzialas (Cuira, Tavau), duas clinicas alpinas ed ina clinica per uffants (Tavau), duas clinicas privatas (San Murezzan, Cuira) e dus centers da reabilitaziun (Tavau, Sievgia).

Adolf Collenberg

## Cussegl da sanità

Il cussegl da sanità è vegnì convocà per l'emprima giada da las Trais Lias il 1735. Quest cussegl sa cumponiva da dus commembers per Lia. El aveva paucas competenzas ed è vegnì schlià durant la helvetica. Ils 19 da zercladur 1805 han ins puspè in-

stallà in cussegl da sanità stabel cun in commember per Lia ed in secretari che survegliava tut ils secturs sanitaris dals umans ed animals. Suenter il 1848 cumpliava quest cussegl quatter medis patentads ed in laic. Ensemen cun la Regenza prendeva el las mesiras da polizia sanitar ed aveva la surveglianza suprema sur ils ospitals, las spendreras, las clinicas psichiatricas, ils bogns da cura e las praschuns. A partir dal 1850 fascheva part era il veterinari chantunale dal cussegl da sanità che numnava la cummissiun per ils examens d'admissiun per medis, veterinaris ed apotechers (fin il 1877) e per dentists (fin il 1888). Il 1866 è vegnida fundada ina secziun separada per ils veterinaris che consistiva dal president e dal vicepresidente dal cussegl da sanità, dal schef da polizia e dal veterinari chantunale. Il 1894 èn omaduas secziuns vegnidas transfurmadas en cummissiuns consultativas e sutmessas al Departament da sanità. Ellas han obtegnì il dretg da proposta en las elecziuns dal personal da sanità.

Adolf Collenberg

## Medis

Ils medis appartegnan ozendi a las uschenumnadas professiuns libras. Questa posiziun è il resultat d'in lung process da professionalisaziun ch'ha manà a l'uschenumnada medischna scolastica actuala. Il temp medieval distingueva tranter medis e barbiers chirurgs. Davart la preschientscha da medis scolads en il Grischun avant il 16avel tschientaner n'avain nus naginas enconuschientschas precisas, lur dumber era en scadin cas fitg limità fin viaden il 19avel tschientaner; per il 1762, per exempel, èn attestads tut il pli 10 medis cun ina furmaziun scientifica. Ultra d'intginas spendreras e d'insanquants plevons mettevan fin alura ils barbiers chirurgs la gronda part dals guariders; els na valevan betg sco medis per propi, ma eran cumpetents per far tagls d'avaina, metter ventusas, trair dents, far clistiers, tagliar ruttadiras, operar il cataract ed auter pli (oravant tut guariders en professiun accessoria). Ils blers eran activs a Cuira sco era (stagionalmain) en bogns da cura ed ospizis.

Ils medis acquistavan lur furmaziun oravant tut a Basilea (a partir dal 1460), en l'Italia, Frantscha e Germania (17avel/18avel tschientaner), a partir dal 19avel tschientaner pli e pli era a Berna ed a Turitg. La midada fundamentala da las enconuschientschas professiunalas e la professionalisaziun academica èn succedidas pir enturn la mesadad dal 19avel tschientaner: l'orientaziun scientifica (scienzas natiralas) ha definì da là davent il savair professiunale exclusiv (medischna da scola). Ils emprims pass per instituir in urden sanitar en il Grischun ha fatg la helvetica; il 1805 è vegnì installà l'emprim cussegl da sanità chantunale e dapi il 1808 stuevan ils medis avair ina patentà per exercitar quella professiun. Il 1820 è vegnida fundada l'Unìun grischuna da medis, il 1829 dumbrava il Grischun dentant pir 23 medis patentads (per ca. 79 000 abitants), il 1850 51, il 1875 63 (per 92 000 abitants). L'urden sanitar dal 1851 prescriveva la maturità, in studi da basa umanistic u in tal en scienzas natiralas ed in studi specific da trais onns. Il

1874 èn vegnids unificads ils examens per l'entira Svizra. L'emprima dunna grischuna ch'ha acquistà la patentà da media è stada Emilie Lendi da Tumein. Cun la fundaziun dals ospitals moderns a Cuira ed en las regiuns dal Grischun sco era da las clinicas psichiatricas (Waldhaus/Cuira, Beverin/Cazas) enturn e suenter il 1900 è la specialisaziun s'augmentada; la qualità dal provediment è sa megliera fundamantalmain ed il Grischun ha cuntanschì il nivel svizzer. Suenter ch'ils medis da champagna èn stads fitg preschents per decennis en tut las valladas grischunas, sa mussa actualmain ina mancanza pli e pli manifesta da quella gruppa professiunala. Era ils lieus dals ospitals regiunals ed ils onuraris dals medis èn vegnids sut squitsch a la fin dals onns 1990 cun l'emprova da limitar ils custs per la tgira da la sanadad. Dumber da medis cun in'actività professiunala en il Grischun 2006: 654 (183 medias), quai che correspunda a 293 abitants per medi.

Adolf Collenberg

## Unìun grischuna da medis

En l'urden vegl da la citad da Cuira appartegnevan ils medis e chirurgs a la mastergnanza dals pasterners. Il 1700 è sa furmada ina Societas chirurgorum Curiensis. Ils 18 da december 1820 è vegnida fundada a Cuira la Aertzliche Gesellschaft des Kantons Graubünden. L'intent da quella era la scolaziun scientifica dals medis e la derasaziun d'enconuschientschas medicinalas tras referats, discussiuns ed organs specialisads mess en circulaziun. L'emprim president è stà Paul Eblin da Cuira. Quest'unìun recepiva era medis dals bogns da Ragaz e dal Principadi dal Liechtenstein. Sin iniziativa da Gion Barclamiu Arpagaus è vegnida endrizzata il 1849 ina cassa d'agid per medis e lur famiglias en miseria. Quella è dapi il 1954 ina fundaziun libra da tagliar. Il 1875 è l'Unìun grischuna da medis daventada commembra dal Schweizerischer Aertzlicher Centralverein e dapi quel onn èn ils medis pratigants en il Grischun automaticamain commembers da l'Unìun grischuna da medis. En ils onns 1923-24 èn dentant 24 dad els sortids da quell'unìun pervia da divergenzas d'opiniun pertutgant ils examens da medischna natirala tenor il plevon Johannes Künzle. L'admissiun da quella medischna natirala ha tribulà onns a la lunga l'unìun. Dapi il 1970 tgira ella relaziuns pli stretgas cun las unìuns parentadas dals dentists ed apotechers e cun la Societad da veterinaris grischuns. In grond dumber da medis è adina stà activ en la Societad grischuna per la perscrutaziun da la natira. Commembers: 1830 19; 1890 49; 1909 109; 1970 213, 2010 576.

Adolf Collenberg

## Lexicon Istoric Retic

Il LIR cumpliava bundant 3100 artgels (geografics, tematics, artgels da famiglias e biografias) davart l'istorgia grischuna/retica e la Rumantschia. Editura: Fundaziun Lexicon Istoric Svizzer; versiun online: [www.e-lir.ch](http://www.e-lir.ch); versiun stampada: [www.casanova.ch](http://www.casanova.ch) u en mintga libreria.



Il tagl d'avaina – ina pratica medicinala frequenta fin en il 19avel tschientaner. (Illustraziun dal temp medieval).